

四庫全書

史部

欽定四庫全書

史部

平定兩金川方略卷三十七

員外郎_臣顧宗泰覆勘

總校官原任侍講_臣王燕緒

欽定四庫全書

平定兩金川方略卷三十四

六月壬辰溫福豐昇額奏言臣等前此攻克北山

美美寨得奪取南山碉寨賊衆較前防守愈嚴但

當乘此銳氣奮力進攻可期得手若稍事遲疑更

為難辦初十日辰刻令侍衛廣音素明仁寧珠布

叅將成德等帶領官兵上衝攻獲賊卡二座殺賊

十餘名一面令侍衛明仁護軍校巴克清阿領兵

向上連立三卡移礮轟推賊卡至牛天昇處向下
攻壓雖奪獲賊番第一礮卡進攻二卡但此卡築
在峯顛兩旁俱係陡壁無路可繞若由山前向上
夾攻則地勢險狹難用多兵臣溫福于初十日令
牛天昇等先在賊卡附近埋伏俟賊出戰即行勦
殺十一日天未明時令官達色帶兵吶喊前進賊
番聞聲即從卡內突出百餘拒敵經牛天昇之兵
衝入鏖戰殺賊四十餘名十四日晚臣又派兵四

百名令侍衛巴雅爾哈薩爾圖章京官達色等在賊所據山下設伏一面派章京英海等協同牛天畀合擊卡內賊番并令于寅刻乘其不備點放號礮四面合攻分取賊番前卡又派廣音素寧珠布明仁成德等各帶所屬之兵由山腿向上排列截殺各處來援并山上敗逃之賊分撥已定臣親領官兵接應該鎮將各以時前進牛天畀等帶兵直抵卡前因溝深難越將備帶木植搭作橋梁令兵

丁魚貫而進突然喊殺賊不及防隨將賊卡石牆
剗剗而把總胡第魁帶兵二十餘名先行衝入殺
死卡內賊番十餘名奪得刀矛鳥鎗其餘賊衆俱
越卡牆奔潰正在折毀卡座之際溝內賊衆知覺
放鎗且溝上所搭木橋止容一人行走不能多過
其衝入賊卡之二十餘人與賊鏖戰已有數人受
傷是以週圍深溝未及奪獲至在山下設伏之巴
雅爾哈薩爾圖官達色等正由山路上攻而山頂

賊衆三四百名亦分三路向下抗拒我兵奮勇攻
擊殺賊甚多其在山腿排列之兵亦奮力上攻堵
截來援之路賊俱逃走奔入山溝碉卡內藏匿不
出惟于孔眼放鎗我兵自子刻打仗已至已刻又
值大雨盆傾是以暫撤又搃兵李煦等報稱初五
日同侍衛阿爾素納前往富勒渾造卡處向前接
立卡座有賊二百餘人突來侵擾經李煦同阿爾
素納等督兵接仗賊者傷死甚多隨立大小卡二

座等語初六日又令副都統海蘭察速取賊番木城以便夾攻木蘭壩海蘭察即于本日上山與李煦阿爾素納會合初十日乘天氣晴明帶兵一面立卡一面夾攻木城時有三百餘賊出拒殺死三十餘名餘賊潰回死守因即連立二卡駐兵據守十三日海蘭察李煦等帶兵又在木城旁佔據山岡正在立卡忽有賊番二三百名來奪是岡我兵殺賊十餘名赴勢立卡三座俟再立數卡逼近賊

番木城審察情形即行向下攻壓等語至臣豐昇
額處從前攻取美美寨時見美美礮大礮旁有礮
三座依峯築建帶兵攻得頭礮進撲兩次因難驟
克旋即撤兵後復逼近賊礮詳加察看見其佔據
得勢惟有小路一條其東向俱係懸崖峭壁西面
雖無路道尚可緣山脇而行臣與舒常馬彪等商
議派兵砍木前進共立卡十四座移礮轟推見其
礮比頭礮較為堅厚臣督兵攻推一夜次日觀看

稍有損壞臣思現在轟擊已至日中料賊無防範
或竟可以襲取即派兵二百名令烏什哈達佛倫
泰巴三泰等帶領自西面山脇而上又令馬彪彰
靄帶兵二百名從山梁小路進攻臣帶兵二百餘
名接應兩路連放號礮官兵各視礮烟所起直抵
卡前賊番出拒不及放鎗即用烏鎗擊打官兵正
在力戰見此外兩礮中有賊二百餘來援臣同舒
常馬彪等即帶兵前往截殺殺傷者甚多賊敗

入第二礮內臣此時籌計先取美美卡外兩礮以截斷色爾渠賊番救應之路則色爾渠亦不難攻

取奏入

上諭軍機大臣曰溫福等奏南山兩山打仗雖得賊卡一二處至于美美卡色爾渠木關壩並未攻得官兵冒險殺賊尚屬奮勉著溫福等將此次出力官兵存記俟續得要緊地方一併議叙至自進兵以來伊等摺內常稱賊番所佔地方險狹人不能登當知山高

路險我兵與賊所同豈有我兵難走而賊便易走之
理乎伊等所奏賊必在山頂峻險之處修蓋碉卡亦
為不解賊既在高山頂上其汲水取柴運送口糧火
藥鉛丸等物自必從下運上若無道路何以源源饋
送而賊番又何以前來救應賊番既有路逕我兵亦
可找尋一得此路即據此處以斷往來伊等何不
留意乎溫福等嗣後進兵至險狹處所惟斷其運送
之路賊碉自不能守則從中必亦自亂我兵既可以省

力而賊酋亦能速滅

癸巳阿桂奏言

臣

等自抵軍營查閱南路情形自

約咱以至達烏六七十里間山勢均極峻險碉卡
更為稠密前此官兵等力能攻取實非不可用之
兵至自果洲山後失事之初官兵與金川賊番當
面對敵殲戮五六百名獲取牛羊二百餘頭前以
綠營兵丁所言尚不足信近有脫出之侍衛額林
普爾跟役回人鄂特則爾言亦無異自非虛誑惟

是挫失以來兵氣不無稍沮臣未到之先聞夜間營中時有驚擾之事臣每諭以賊衆不過恃其地險專心死守至于接仗原非官兵敵手即如前此果洲山後初與金川打仗被我兵殲殺數百惟官兵因見距僧格宗不遠過于輕銳深入被賊截斷後路以致多有墜崖落水者並非賊番勇銳此皆爾等所知何足為慮現已續調各省勁旅前來惟當努力齊心奮勇殺賊以報將士之仇屢次曉諭

官兵頗多醒悟且南路官兵經月未經接仗而我
皇上軫念戎行一體賞給錢糧其疲困匱乏者又令隨
時賞賚官兵感激

皇仁人人思奮已漸有起色惟是此間帶兵之提鎮等
絕無諳練之員軍興以來承辦諸事惟宋元俊一
人而該鎮不過在川年久悉熟番情調遣土兵為
土司所信至于行兵接仗亦未經閱歷是以紛若
亂絲一時不得其頭緒即如歷來以原營將弁帶

領原營兵丁始能呼應得宜今查閱各隊多有此
省弁員管領別省兵丁而兵丁亦各營雜湊以致
什伍不能相習且經展轉調撥本營之官遂有不
知本屬兵丁去向者是以稽查兵數一時難以清
釐遇有陣亡事故急切亦無確數即如各營所存
火藥鉛丸及有無短缺軍械臣到日即以詳查迄
今尚未有實數現在嚴行指示加緊督催旬日之
間亦可期其清理至糧運一事係地方官之專責

臣惟當鼓勵官兵奪勇進勦但現在卡了一路無
五日之糧不但統兵進發累糧有所不敷即今溪
河漲發人夫短少一日運到之糧尚恐不足供一
日支發之用臣察看情形恐致貽誤亦向阿爾泰
告知令其實心籌畫上緊趕辦

上諭運機大臣曰前因川省兩路軍營糧運緊要傳諭
文綬令其速付新任董辦今阿桂奏現在南路軍營
糧儲短少不可不急為妥辦文綬諒已起程在途再

傳諭該督不必俟蒞任後始行籌辦以致緩不濟急
一入川境既將南路糧運應如何急辦之處悉心熟
計速為轉運務使軍儲口糧源源接濟以資進剿
上又諭軍機大臣曰南路軍糧自上年十二月起即令
阿爾泰在章谷一帶專辦自應及早悉心籌畫即使
該處轉運稍難亦宜早為據入實告另行熟計乃遲
悞若此阿爾泰視為泛常直至福隆安阿桂先後到
營查出始以一言塞責是南路糧儲不敷之處寔阿

爾泰貽誤現已令文綬一入川境速行辦理但阿爾泰究係傳派辦理南路兵糧當早知改悔即行設法趕運俾軍糧得以源源接濟倘再有遲缺于軍務所關甚重恐阿爾泰不能辭其罪也

同日福隆安阿桂奏言查官兵自果洲山失利之後迄今兩月未能復振是以臣等抵營後即同往達烏各處週視兵丁營卡并前敵東西兩山梁及賊番據守情形緣南路山勢自約咱迤北逐漸偏

仄兩山一河之間層巒陡起石壁峭立比西路更為險窄至達烏則兩山環抱東面山根至此橫出其旁絕壁萬仞沿山均有賊番石卡其紆迴細逕賊番設立木柵在山根水澗之間甚為堅固其西亦係陡壁現在雨水盛行山溪漲發河流直刷山根全無道路而沿山坡礪之上賊皆設卡施放鳥鎗與木柵互為應援實為至險至惡之地臣等察看林箐巖嶂間賊番來往搬運木石詢之土練云

多係金川賊衆亦未撤退臣等詢問侍衛章京鎮
將并土兵頭目等現在宜如何攻擊據稱賊番佔
盡地利若進攻東山梁即于石壁上滾放木石我
兵已不能站立而前面木柵並西山梁卡內施放
鳥鎗均可及此我兵三面受敵傷損必多且地形
峭仄兼臨大河即欲築立木柵石卡以逼賊番勢
亦不能而宋元俊則堅稱此地如此險窄萬無進
攻得利之理必須另覓路逕繞出兩山之後賊番

自不能守前此原因無路可進查探果洲山後間道以繞截西山梁賊後今自官兵失利賊于此處亦以設礮嚴守其東山梁後即係汗牛地方該處路亦險窄且距僧格宗尚隔一河然可繞出賊後但既兩路發兵除酌量留防後路各要隘外須整備一萬一二千兵出其不意長驅直入方可直抵僧格宗逕搥美諾若使層層攻擊多費兵力更不免稽延等語查約咱卡了一帶本非進兵正路而

達烏距僧格宗不遠一抵僧格宗即可進搥美諾
故賊番覓其地險悉力死守但自去年收復明正
土司地方直至此間又不可舍此另得取道惟是
目前險隘已極兵力難施自不得不覓間潛進查
前此果洲山間道之兵業經繞出賊後將至河邊
寔因官兵止有三千不能沿途分布是以後路險
要之區轉為賊佔以致糧盡無援今若繞道從東
山前行約須四五日踰箐穿林過溪越嶺必當計

出萬全而墨壘溝一帶仍須發兵前往奮力夾攻
方可以分賊勢而期深入自非多兵不辦第以現
有兵力而論連新到之陝甘兵共有漢土兵一萬
一千餘名除東西兩面要隘留兵防守外竭力抽
調不過得兵練四千餘名實屬不敷分路臣福隆
安以目下形勢雖難仍當嚴催鎮將上緊籌辦臣
阿桂現在一面催促阿爾泰速辦綽斯甲布一路
軍糧俟有就緒即令宋元俊等前往攻擊如索諾

木撤兵自衛賊情稍沮當即乘機進取奏入

上諭軍機大臣曰福隆安等奏閱看達烏一帶路徑險峻勢難進攻若從東山繞道前進仍須于墨壘溝一帶夾攻自非多兵不可等語此處正路既極險惡自不宜令兵丁冒險攻堅用力于無可着力之地至覓徑繞道固為勝算亦難必其果出萬全且又須多添兵衆現據阿桂奏南路軍營無五日之糧現在之一萬五千餘衆口食尚且不敷若再添調陝甘兵二千

湖廣雲南兵五千約計每日又須增糧七十石供饋
自必倍增竭蹶若徒集衆坐守糜餉耗時更屬非計
朕意達烏逼近賊巢而僧格宗又係小金川出入要
逕自不宜棄而不顧但既知其難即宜思所變通或
僅于僧格宗至約咱一帶要隘留兵防守使賊番不
得外軼仍于進兵要路派兵攻擊以綴賊勢令其不
疑設或金川賊衆撤回有間可乘原不碍乘機進取
或將兩路撥派餘兵及續調未到之兵均令併往溫

福軍營聽用西路北山之美美卡色爾渠南山之瑪爾迪克現俱分路攻勦且有可進之勢添兵自更為得力而策卜丹一路又係通賊巢要險前據溫福等奏現在探覓間道若再得分兵攻擊必當有濟如此通盤酌劑較之南路株守不能寸進者奚啻事半功倍而南路運糧稍減又可不致耽延貽誤此係朕遙為籌度未能信于該處情形果合與否福隆安業經親往閱勘地勢軍情皆所深悉著將調往西路是否

可行之處即據所知覆奏至阿桂現在南路此一路之多兵有益無益自必深籌且甫自西路前來亦能得彼處要領著傳諭溫福阿桂速將西路實在情形應否調撥之處各據所見從長籌畫詳晰速奏

同日阿桂又奏言查自京前來之章京扎爾桑副都統永平自雲南前來之侍衛阿坦保綏庫誠昇保利保住等俱于六月初五初八十二等日陸續到營現將伊等酌量派給差使惟查現在南路總兵

並無歷練之人而所屬官員優者更少此後如有
發來軍營効力之人懇請

皇恩于南路多發數員以資帶兵攻勦奏入

上諭內閣曰阿桂奏請將効力之人多發數員著照所
請將前鋒章京拉布棟阿健銳營叅領賡音太副叅
領寧泰扎史三等侍衛科瑪普濟保副護軍叅領伊
爾哈納火器營額叅領佛爾格訥孟德前鋒校登保
色保發往四川南路軍營交與阿桂派給差使行走

同日阿桂奏言查宋元俊臣于乾隆二十九年
在四川時即經認識今自抵南路見福隆安審訊桂
林一案究出各情節始知其居心行事至于如此
今于案情未上之先已蒙

聖訓即令防其自用聰明仰見

聖明垂照實為洞燭無遺查該鎮本非打仗出色之人
不過在川已久熟悉邊情尚為附近土司所信從
現在辦理番情無人能出其右並無人可以替代

臣以軍事為重是以遇事多與詢商冀收指臂之效今蒙

皇上指示臣惟有留心察看倘其奮勉出力軍營使詐使貪原所不廢自當相待稍優以期于軍務有裨如或剛愎自用逞其私智又不肯實心奮勉亦即據寔嚴叅斷不敢稍為姑息奏入

上諭軍機大臣曰前據福隆安奏查審桂林一案訊出宋元俊種種險詐寔已昧盡天良若令帶兵攻勸轉

恐于事有碍因降旨將宋元俊革職拿問解送行在
訊究並以綽斯甲布一路若軍營無得力大員即著
阿桂親自前往而令福隆安在南路辦理續據福隆
安等奏綽斯甲布帶兵仍派宋元俊前往朕于此一
節甚不放心曾屢次傳諭如宋元俊已經起程即將
前旨暫緩宣露視其出力與否再為核定今日阿桂
奏到亦深知其人之不可恃第因熟悉番情將領中
無出其右以為軍營使貪使詐本所宜然所謂知其二

不知其二也若將領中不過尋常過犯則使功不如
使過原可期其收效桑榆今宋元俊良心已喪方寸
既不足憑焉能望其為國出力若宋元俊尚未起身
即照前旨辦理為妥又阿桂奏查閱各隊兵丁多屬
零星湊撥是兵將既不相習焉能收指臂之益此實
桂林辦理不善今阿桂已在軍營加意振作自可望
其日有起色惟在阿桂實力擔承以圖奮勉奏功耳

同日福隆安阿爾泰阿桂奏言

臣等接奉

上諭酌賞各土司緞疋南路著臣等傳

旨賞給臣等查巴旺土婦伽讓布拉克底土舍安多爾

均距大營不遠當即于備賞緞疋內動用傳

旨賞給至綽斯甲布土司工噶諾爾布應俟宋元俊領

兵赴彼時令其携往給賞其明正土司住居打箭

爐臣福隆安應于歸途之便面加賞賚其餘木坪

瓦寺各土司均聽溫福等西路就近分給再桂林

新調之德爾格忒巴塘裡塘霍爾章谷納林沖孔

撒麻書緯富白立余科等各土司現亦均遵檄諭
各派土兵陸續前來在革布什咱等處協防甚屬
恭順今若獨賞巴旺布拉克底兩土司恐伊等不
知辦事之先後疑

天朝于各土司稍有區別似應推廣

皇仁一體予賞以昭獎勸

臣

等酌其出力之多寡土司

之大小擬將德爾格忒土司魯珠布甲木錯及巴
塘土司衮布甲木沁裡塘土司丹津衮布賞色緞

各十二疋其巴塘副土司根敦那木扎爾並額外
副土司和爾瓊策凌孔撒土司策丹納木扎爾麻
書護土司土婦策旺噶爾瑪賞給色緞各八疋章
谷土司策登諾爾布納林沖土司汪扎爾策丹綽
富土司朋楚克拉布丹賞色緞各六疋白立土司
滾布納木扎爾余科土司阿喀溫布賞色緞各四
疋統俟

命下之日分別給予如此則土司等普沐

鴻慈自必益加奮勵至三雜谷土司派兵番兵願從曾
頭溝進剿亦宜一體加賞應將梭磨土婦卓爾瑪
卓克采土司甲噶爾布木從噶克土司納木扎爾
各賞色緞十二疋如蒙

恩允行文溫福令其就近給賞奏入報

聞

平定兩金川方畧卷三十四

欽定四庫全書

平定兩金川方略卷三十五

七月甲午

上諭軍機大臣曰川省本係產硝之區何以自上年將
舊存火藥用完竟未續行配合不但火藥須他省協
撥併硝斤亦欲仰藉鄰封是川省之辦理火藥與糧
運同於懈怠著傳諭文綬即速嚴飭運辦配造并飭
沿邊加緊盤詰毋致透漏外出

乙未

上諭內閣曰軍營糧務緊要西路派劉秉恬專辦其南路著派侍郎鄂寶馳驛前往會同阿爾泰督辦並給與欽差大臣關防應用

丙申

上諭內閣曰文綬奏甘省奉調官兵俸賞行裝等項銀兩均于新疆經費內借支動用請撥銀七十萬兩以便還欵著照所請交戶部於甘肅附近省分照數通

行撥

丁酉溫福豐昇額奏言三雜谷帶兵之遊擊沈寬
於六月初六日至孟拜拉察看形勢西北係丹壩
交界西南即與金川交界東南緊接小金川當諭
三雜谷頭人派兵據守該遊擊帶領土兵二千餘
名於初七日進發至小金川之囊雲丹地方修柵
安營現派番人跣探路徑相機再進臣等飛札董
天弼就急訪察情形指示速辦至牛天昇等佔據

之喇卜楚克最為陡峻路可四通此山餘賊淨盡
則中路官兵即可徑攻木關壩與海關寨等瑪爾
迪克官兵上下夾攻會合進剿是以牛天畀一路
之兵臣等未敢遽行抽撥

上諭曰此等情形惟在汝等相機妥辦原不宜但遵旨
也

同日溫福豐昇額又奏言固卜濟山梁賊番立有
木柵兩座正當前往木關壩之路必須設法攻開

隨於六月十九日一面分派牛天畀等照前攻取
山上礮卡牽制賊勢一面令侍衛賡音素等帶兵
先後進發臣溫福親往接應直至固卜濟山下賊
番知覺出拒官兵勦殺連奪四卡餘賊潛入木柵
官兵四面圍攻乘勢通道又用大礮轟摧賊衆藏
於柵內仍放鎗擲石不絕旋有頭人耳帶珊瑚大
環持刀出南門拒敵當被千總曹順殺死奪獲其
門拋擲火彈週圍木柵立即燒焚其捨命逃出者

俱被我兵痛殲柵內之賊焚死無遺檢驗一百有餘奪獲刀鎗衣物甚多隨即扎營駐守并運往大礮以備轟摧第二座木柵之用其牛天畀之兵同時督率前進奪取賊番第二三四等卡海關察亦連獲卡即於其地趕立卡座運礮轟擊賊番各有差此數日打仗三等侍衛額爾特左膀被擊受傷空銜藍翎穆克登保股被鎗傷俱屬無碍至美美卡一路臣豐昇額以賊番知我兵專意進攻美美

卡於色爾渠防守備無稍懈因同舒常馬彪等前
至色爾渠即派烏什哈達巴三泰等各帶兵三百
名左右分翼進攻舒常馬彪各帶兵一百名於兩
路接應臣豐昇額帶兵二百名從中路進攻將近
賊卡官兵奮勇突入賊衆喧譁奔竄臣等追至色
爾渠大寨之下賊番放鎗抵禦官兵因將所奪石
卡折毀通行撤回次日復用大礮轟擊另派烏什
哈達等帶兵四百名潛下巖礪臣等帶兵二百名

由僻路接應固原兵丁陳世寶從山溝起衆先登
中石墜落復奮力與官兵俱一齊登礮賊番放鎗
死拒官兵毫無畏避躍入礮牆鏖戰多時將礮卡
全行奪獲賊番被殺無數頭目一人亦被官兵石
擊墜崖臣等復恐賊番乘夜侵擾派侍衛新達蘇
輪流放礮轟擊賊番第二礮使不得休息又令烏
什哈達等帶兵由山溝中乘機突進賊番四處潰
散又將附近礮卡奪獲再查此次三等侍衛額爾

特藍翎侍衛寧多布巴三泰等于是次尤為奮勇出力可否量與獎賞之處出自

聖恩奏入

上諭內閣曰此次攻勦賊番碉柵溫福豐昇額實力督率將領弁兵等奮勉出力均屬可嘉著交部一併議叙固原兵丁陳世寶奮勇出衆着賞給千總遇缺即補並賞銀五十兩以示獎勵額爾特着加恩賞給扎珠木巴圖魯名號仍賞銀一百兩巴三泰賞戴花翎

陞補三等侍衛

上又諭軍機大臣曰抄截後路乃賊番慣技自當於各要隘處嚴密防備無稍疎虞着傳諭溫福阿桂等隨路留心不可日久生懈至前因南路情形急切難於進取或酌量留兵牽制賊勢餘兵改撥西路併力攻勦今賊番因西路攻打甚緊將南路防守之賊撤往西路是現在南路一帶賊番守拒必疎阿桂尤當時刻留心察探一有可進之機即當乘虛攻擣以期殄

入

戊戌阿桂奏言達烏東西兩山梁均極險仄現於
東山後尋覓間道即於一二日內進發雖糧未能
刻期運到但機會可乘不敢因此稍有所遲滯奏

入

上諭軍機大臣曰軍行糧餉不繼所關甚重朕因此益
增緊念阿桂向遇事持重此次進攻必實有其可進
之機斷不至冒險輕進現已嚴飭阿爾泰上緊趲運

軍糧以資接濟朕惟盼捷音速至耳

上又諭軍機大臣曰阿爾泰自上年賞給散秩大臣令其專辦糧務伊久任川省總督文武皆其舊屬不得諉為呼應不靈何辦理半年餘尚貽誤若此阿爾泰着嚴行申飭令阿桂現由東山覓間進兵糧食所關尤為緊要阿爾泰務要上緊辦運以資接濟若有遲誤惟阿爾泰是問現派鄂寶往南路同辦運糧務鄂泰倘稍存倚仗推諉之心則自取罪戾矣

上又諭內閣曰現在所調官兵陸續抵川尅期集事軍需用項自應寬為預備着戶部再於庫內撥銀一百萬兩派員解往備用

辛丑

上諭軍機大臣曰前此薛琮由墨龍溝進攻告急時桂林曾令宋元俊帶兵赴援渠以不得進路為詞去而復返又欲改由革布什咱取道亦未成行已有遲誤之咎其於桂林用銀贖人一款種種情弊俱不能無

罪因念其於番地情形尚所熟習特從寬宥仍令帶兵往綽斯甲布督率土司兵練進攻宋元俊如知感恩奮勉實心籌辦將來功罪原可相抵若竟能得間窺入擣穴擒渠必更膺酬勲渥典或竟意存觀望惟蹈綠營虛誇積習則其取戾更大宋元俊自遊擊不數月擢總兵官受恩較常人尤重益當力圖自勉朕辦事一秉大公禍福惟其自取將此嚴切諭令宋元俊知之

癸卯

上諭軍機大臣曰阿桂奏南路侍衛章京俱令與錄營
勦賊之人一切攻勦情形必須親駐其地詳細體察
兵丁出力與否亦必朝夕同處彼此相習方能調度
得宜若平素但在營盤附近居處臨陣方領兵行走
官兵何能合為一心此必從前桂林為總督時將伊
等賓客相待所以有此錯謬今阿桂既將伊等分發
領隊著傳諭溫福等西路軍營亦即照此辦理

同日阿爾泰阿桂奏言臣等奏明於東山梁後尋覓間道即於六月二十三日分兵三路從扎哇窠山前進至魯楊山麓見有木城三座石碉四座官兵乘其不備搶上山梁賊衆敗逃當將卡棚佔住次日官兵復進繞過山梁數道直抵魯楊山梁之下山形壁立並無路徑而懸崖上均有賊卡踞守臣等以駐兵籌辦時日多稽糧運不無難繼因即撤回又防賊番乘勢尾隨一面設伏一面撤兵果

有賊番分路衝突前來經官兵奮力截殺殲斃甚多並斃紅衣頭目一名賊衆潰散官兵按隊撤回現另探覓路徑再圖進取奏入

上諭軍機大臣曰阿桂從東山梁進攻雖得有數卡殲戮賊番及其頭目兵氣稍覺奮揚但以路險山高不能深入旋即撤回仍屬有名無實是該處形勢進取頗難據阿桂另摺奏稱昭通湖廣兵各三千名到日可期得力如果阿桂訪有僻路可繞過僧格桑前後

則添此新到之兵自屬甚善何以不善為籌畫何如
仍遵前旨將續調現在有餘兵概行調往西路併勢
進攻阿桂仍駐劄南路以綴賊勢遇有瑕隙仍可相
機進勦是南路坐收牽掣之功西路實資多兵之助
着傳諭阿桂速行妥議具奏

上又諭軍機大臣曰現在進勦小金川後必須並勦金
川屢降諭旨甚明但向于進勦金川一節恐其聞風
預防未經宣露因思索諾木與僧格桑黨惡敢於助

兵拒抗諒必早作準備且其惡跡已彰莫若明斥其
罪使知鬼蜮伎倆不能潛匿抉其微庶足以褫其魄
並使番衆知索諾木罪大惡極為覆載所難容不但
捨死助逆自罹誅戮或可令番心離散剪其黨與自
屬先聲制勝之道竟當傳諭金川云爾金川昔年郎
卡恃遠跳梁致煩天討及王師歷境破在旦夕郎卡
誨罪投誠蒙大皇帝格外矜全允其降服郎卡感恩
畏法恭順如初二十餘年恪奉土職故番衆尚得安

享太平乃自郎卡歿後索諾木輒敢逞其獷悍之性不遵父訓不感國恩陰與僧格桑狼狽為奸侵擾鄰境土司僧格桑違悖總教約甚至抗拒天朝罪在不赦今爾索諾木或稍有人心速將僧格桑擒獻尚可自贖其罪繼聞爾金川有幫兵之事旋據索諾木具稟云因伊姊在彼遣人往護及大兵屢次攻勦小金川賊寨凡屬險隘皆爾金川賊番拒守迎敵並節經俘擒醜類俱供爾索諾木亦有頭人丹巴沃咱爾等

帶領賊衆在小金川代其分路抗拒狼狽肺腑已經
畢見豈尚以護姊為詞乎其罪實與僧格桑相等今
本將軍等調集各省精兵每路數萬攜帶大礮分道
進攻摧堅易如拉朽勝兵深入玉石俱焚爾索諾木
若能幡然悔過即將幫小金川之賊番盡行撤回並
將逆酋僧格桑立時縛獻軍門本將軍等代為奏聞
大皇帝或念爾父郎卡昔年效順之誠加恩赦爾一
死若仍執迷不悟則是爾索諾木惡貫已滿自取滅

亡及至大兵臨境命懸呼吸始行搖尾乞憐斷不能復為輕宥昔爾父郎卡尚可云無知初犯特予矜全今爾索諾木怙終稔惡法在必誅豈能復思效爾父郎卡之故智乎至爾金川番衆本屬良民久安作息自索諾木肆惡以來爾等為驅遣一代小金川死守窮碣捐棄室家身撓鋒鏑已屬非計向或不知索諾木逆惡甘心為父土司出力今將索諾木罪跡宣布爾等知索諾木不遵父訓即為不孝不感國恩即為

不忠抗拒天朝即為叛逆似此不忠不孝叛逆兇豎
與禽獸何異爾等良善番衆何必為禽獸致力取死
雖至愚必不出此爾番衆等如能明於順逆之道及
早投降仍令爾等安居善地原可飽煖樂業倘或不
知審擇甘助逆渠即屬逆黨將來大兵一至有誅無
赦悔之晚矣其索諾木兄弟若有能體爾父郎卡之
志思保世業者速將索諾木擒獻即令承襲土司全
其一脉設或袒助逆首則有逆黨緣坐例在悉皆駢

戮雖已出家充當喇嘛亦不能赦天理王法順逆顯然禍福惟是爾等自取特此明切傳檄云云照此譯成番字謄寫多張于兩路軍營分頭宣布或選土兵持往或擇俘獲無用之人賣回宣示是亦解散衆心之一法溫福等仍按應行進攻之路俟衆兵調齊分道並勦不可因有此諭稍存坐待之見

同日

上諭內閣曰陝甘貴州各省調赴進勦官兵均知奮勉

出力現在時交秋令兵丁等均需皮綿衣服禦寒且
到營已久鞋帽亦須添換茲據文綬奏甘省各營已
飭令將弁等於各兵應得錢糧內製備運往念其程
途較遠運送稍艱已傳諭勒爾謹妥協辦理所有運
償加恩賞給准入軍需項下報銷其陝西貴州調往
之兵並着一體料理即湖廣雲南及陝甘續調之兵
雖係初派着該督等亦當酌量妥辦俾人人有挾纊
之歡以期感奮集事

甲辰陳輝祖奏言竊臣接奉

諭旨於湖北湖南近山各營預備兵五千名內先調三千赴川查各省製備行裝例准借給銀兩俟凱旋日於應得俸餉扣還乾隆十三年楚兵赴川成案自總兵至副將遊擊都司等官各依等次准借自五百兩至一百兩不等守備千總把總外委准借自八十兩至四十兩馬兵每名二十四兩步兵十八兩守兵十五兩不等但現值溽暑衣裝本為輕

簡恐兵丁等領銀糜費迨至秋寒轉無資用應先
借給一半令其辦裝前進其餘一半咨明川省俟
至成都之日墊發支給仍于楚省歸款其官弁應
借之數亦一體酌辦又總兵官照例帶銀五百兩
叅將遊擊例帶一百兩以備獎賞奮勇兵丁俱俟
凱旋造冊報銷至鉛彈火繩加倍攜帶現同軍裝
等項另運隨行其鑼鍋帳房行李步行難以背負
照例雇夫逐站運送奏入

勅令戶部議奏旋據奏言借給行裝一款自應按照品級查與從前成案相符應准如所奏借給又派往鎮將等分別支帶犒賞銀兩一款查軍營獎勵官兵自有將軍大臣等臨時酌量辦理毋庸各鎮將支帶賞號以致叅差其餘各款俱如所請辦理奏入

上從之

乙巳溫福豐昇額奏言陝甘預備兵五千內其甘

省兵四十名仍應令其從階文松潘行走就近赴
曾頭溝一路接應奏入報

聞

同日溫福豐昇額又奏言南山攻克濟卜濟山梁
木柵後六月二十五日於附近賊番第二木柵地
方帶兵前往拏卡林箐中突出賊番二百官兵迎
擊敗走築城木卡兩座現移大礮轟催牛天昇海
蘭察亦各築造礮臺晝夜攻擊臣豐昇額于美美

卡攻取賊卡之後逼近色爾渠之大寨擊石木克
卡十數處七月初一日仍向賊碉用礮轟擊一面
派烏什哈達佛倫泰等照前分左右埋伏接應又
派彰藹巴三泰等帶兵佔據西北山峰以截別思
滿來援之賊叅領丕泰保埋伏北山下截殺敗往
色爾渠之賊三面齊進鎗礮交接賊番不敢瞭望
臣等督率官兵相機深入殺賊甚衆其受傷竄逸
者又經伏兵痛殲三十餘名色爾渠寨內大礮及

週圍卡房一百餘間盡行搶佔折毀現在督兵進
取美美卡奏入

上諭曰此次出力大臣將弁兵丁等均著交部議叙三
等侍衛烏什哈達補授二等侍衛

上又諭軍機大臣曰色爾渠乃一大寨碉房以百數拒
守之賊甚多所殺僅三十餘賊不足舒憤申威賊匪
如蟻聚支拒一見碉卡垂破望風潰竄此固若輩長
技但以費力攻得一寨自應盡力窮追縱躡逐不及

亦當鎗擊礮轟期于殲殪多人庶使遊魂喪膽若竟
聽其漏網逋誅賊衆必仍向前途要隘聚守是我得
賊寨轉須派人防守分我兵力而賊失此礮寨復留
餘孽為彼寨之人實為非計著傳諭溫福等嗣後務
須設法追勦或量其形勢預為邀截毋使免脫

同日福隆安奏言臣蒙

聖訓垂詢南路地利糧運情形籌酌變通將所有餘兵
撥汰西路併力攻勦查南路地險礮堅較之西路

為甚雖一時尚無越險長驅之策但業已由約咱
卡了進至達烏前距美諾並不甚遠若原集兵力
繞山覓路相機攻取一面撥兵由緯斯甲布進攻
兼為勦滅金川之地使兩金川疲於支守久當自
潰至運糧一事近已將各浮橋塔就餽運章程亦
日有就緒臣懸取事勢西路固較為切要而南路
亦無不可辦之情形請應俟溫福阿桂覆定局奏

入

上諭軍機大臣曰朕前因達烏一帶路徑險仄難以容
集多人與其頓兵無用之地不若酌量撥併西路可
資實濟今福隆安既有此奏著傳諭阿桂其自行酌
量如添調雲南湖廣之兵即能乘勢深入縛賊擒渠
自當檄催滇楚兵丁六千遄赴南路迅速妥辦若多
集兵力徒令株守山谿仍屬有名無實即一面奏聞
一面飭知滇楚帶兵將領徑赴西路應用阿桂務就
實在情形籌度萬全祇期于事有益南路西路本無

區別並將此諭令溫福等知之

平定兩金川方畧卷三十五

欽定四庫全書

平定兩金川方略卷三十六

七月戊申阿桂奏言綽窩土司朋楚克拉布丹綽
斯甲布土司工噶諾爾布各遣頭人具稟言屢被
金川荼毒懇請勦滅除害並願派土兵協勦是金
川罪孽貫盈為衆土司憤恨冀其速亡情事已可
概見臣查西山梁墨壟溝一帶雖極高峻若能相
機搶佔既可破賊番東山梁犄角之勢且可進搗

僧格宗但非乘間出奇一舉集事賊番必更增修
嚴密再辦愈為費力現與鎮將及土弁等詳悉定
議提兵迅進再前日從魯陽山撤回時見山頭坡
角賊番所種零星稞麥漸就成熟即令漢土官兵
割取其餘踐踏殆盡行至格宗賊寨之前並將麥
田悉行焚燒合並陳明奏入

上諭軍機大臣曰阿桂此次辦理甚屬用心奮勉著加
恩賞戴花翎至綽斯甲布等差人投稟尤為極好機

會自當速籌進取所有該處軍糧飭令阿爾泰即行
趕運並著文綬加緊督催毋稍遲緩

上又諭內閣曰文綬自去歲以來辦事俱屬妥協現又
經理軍務著賞戴花翎以示鼓勵

已酉阿爾泰奏言此次先後所調川黔兵丁俱未
隨帶餘丁又未給與馱載銀兩因將長夫應用但
餘丁一名每月僅支鹽菜銀五錢而長夫工價照
站夫之例每日給銀八分所費較多應將黔兵未

領馱載銀兩無庸給發即臣與福隆安阿桂奏派
楚滇二省各官兵如蒙

俞允即須行調來川臣一面飛咨各該省照例備帶餘
丁以資遣用倘臨時亦無餘丁備帶則長夫一項
又應一體應付惟是每兵百名給夫三十名係仿
照餘丁數目酌辦臣查陝甘官兵分起到川經戶
部議准帶餘丁三十名而部咨所開西路成例稱
馬兵四名步兵五名合給餘丁一名是馬兵百名

應帶餘丁二十五名步兵百名應帶餘丁二十名
川省各營官兵均應照例辦理但合計皆未及三
十名之數臣思多帶餘丁即可隨時拔補正兵缺
額應請仍照例以三十名為率若長夫祇供背負
樵汲之用嗣後各省調來之兵其無餘丁者所給
長夫應減去十名每百名給與二十名商之阿桂
據云前管木坪軍營即如此辦理已足敷用是不
獨費貴樽節而民力亦可不致虛勞奏入

上諭軍機大臣曰現據阿爾泰酌議餘丁長夫事宜以
餘丁可備充補長夫祇供樵汲已飛咨各省續調官
兵令其備帶餘丁自應如此辦理又請每兵百名定
給長夫二十名固為慎重錢糧起見但官兵現在隨
營出力已議給與長夫三十名今又忽復裁減非所
以體恤士衆著溫福即就軍營實在情形妥籌速奏
同日

上諭內閣曰前派色布騰巴爾珠爾審訊五岱捏參溫

福一案色布騰巴爾珠爾護庇五岱並未將伊詳審
轉將溫福無關緊要事件反覆搜尋治罪亦所自取
但其人本糊塗尚非有心壞事者可比至五岱意欲
叅奏溫福自占地步亦屬小人常態但無顯然實証
朕亦豈肯以未形之事苛求治罪著施恩將色布騰
巴爾珠爾撤去黃帶在家圈禁五岱著發往伊犁自
備資斧効力贖罪並諭中外知之

臣等謹按五岱從北山進攻久而無效且致色倫

泰陣亡因而獨効馬彪等并參溫福誠如

聖諭實係自占地步而溫福繼叅五岱亦不免過甚其

詞是以

特令色布騰巴爾珠爾赴營研訊使溫福果乖張僨事

難副統兵之任自當據實直奏仰候

睿裁乃於無關緊要之處傳集章京將領等反覆吹求
不思溫福身係將軍現值領兵攻勦致使軍營咸
懷觀望不無稽遲進攻色布騰巴爾珠爾之咎寔

在於此我

皇上執兩用中權其事之大小重輕總以軍務為先因將色布騰巴爾珠爾等分別懲治此蓋一出於大公至正而

權度精詳時宜悉協若謂因固倫額駙之故轉為從嚴辦理是猶以私心揣測於

至聖時中之道未足仰窺萬一也

癸丑溫福豐昇額奏言南路僧格宗地方係小金

川要路而綽斯甲布一帶又進勦金川必由之道該處官兵似未可遽議減撤但現在南路一時未能攻進糧運又不充裕所有第五次赴川之陝甘兵二千名前擬撥赴南路今可令其改赴西路軍營以資調撥

同日溫福豐昇額又奏言曾頭溝一路據董天弼稟稱梭磨官寨相近有路通小金川之大板昭地方可以分兵進勦現在甘省官兵尚未到營董天

弼因校磨土婦懇請助勦已於其所屬土兵內挑
齊一千名預備進發臣以三雜谷一路糧臺事屬
初始恐甘兵到營一時急需難以接濟卽札知劉
秉恬速將應運三雜谷米麪等項督催全數起運
以裕軍食均奏入

上諭軍機大臣曰溫福等奏校磨土婦情願派兵一千
隨札劉秉恬催督糧糈令董天弼上緊進攻籌辦甚
是又現在綽斯甲布綽窩各土司具稟紛紛懇請幫

兵出力此屬最好機會若不趁此殄滅兩酋將來各
土司畏其吞噬必轉而歸附金川則逆酋鴟張益甚
此係萬難中止之事至前此所詢火藥一項原恐其
透漏賊境不可不嚴加防範若官兵破賊攻碉全賴
以此制勝自當隨宜施政過為撙節靳不輕用奚異
於因噎廢食乎其議將續調之陝西兵令往西路在
西路固可稍添兵力但南路現須派兵由綽斯甲布
一路進攻若陝兵減去南路恐又不數著傳諭溫福

阿桂等就兩路實在情形通盤籌畫仍飭令帶兵各員就近取道遄行

同日阿桂奏言查綽斯甲布為進攻勒烏圍正路惟因一時糧運難繼不能多集官兵只可相機攻擊以為牽掣金川之地至西山墨壟溝以外甲爾木山梁若能一舉搶佔則出隘得寬去界就高建瓴之勢既據捺縱在我可以得利此番各省官兵內其得力者黔兵為最川兵與甘兵次之陝兵又

次之連次撥來南路者均係陝兵然多此二千名亦足以壯聲勢而供留守現已飛調陝兵二千名兼程前來以資協勦奏入報

聞

同日阿桂又奏言都司李天佑前因攻破卡了時奉

旨以副將擢用今該員駐兵綽斯甲布漸能熟悉番情請令其先換副將頂帶以資彈壓奏入

上是之

乙卯阿桂奏言川省分路進兵軍糧最關緊要南路山多路遠趲運尤屬不易現在阿爾泰所辦綽斯甲布一路軍糧幾及一月尚未運到若遲至秋後即恐風雪載路挽運更難仰懇

皇上天恩暫令劉秉恬先赴南路籌辦糧石於是更為有益奏入

上諭內閣曰前因川省軍糧緊要特命劉秉恬往西路

鄂寶往南路分頭辦理今南路逕僻路長山巒陡險
輓運較艱尤當設法趕運劉秉恬平日頗能辦事著
調赴南路上緊籌辦阿爾泰著仍在南路幫同趕運
其西路糧務即著鄂寶辦理

丁巳阿爾泰奏言竊查辦理糧餉實為軍需要務
臣自去年軍興以後寢食不安日思自奮無如年
衰血短每於午後神氣昏憤遇有緊要事件時多
叢脞之虞即協同督臣辦理軍需糧餉實屬不能

勝任惟求

皇上天恩將

臣

革職但兩金川滋事之始本係

臣辦理

不善當此軍務緊急之時豈敢置身事外仍懇

天恩將

臣

留在軍營効力俟軍務告竣倘尚能黽勉行

走另請當差奏入

上諭內閣曰阿爾泰前在山東巡撫任內察吏安民克副任使擢授四川總督於地方政務亦屬認真是以加恩簡任綸扉仍膺封疆重寄小金川一事固由阿

爾泰辦理不善但以小金川與鄂克什土司蠻觸相爭本不值輕議加兵因諭令妥協撫馭以靖邊隅及阿爾泰親至土境面諭僧格桑退地受約遂亦宥其既往此實朕不欲勞師動衆之本懷是以於阿爾泰格外原宥卽伊獲罪罷斥之後旋復賞銜任用令其專辦糧務乃於南路軍糧節次遺悞現在籌及綽斯甲布一路分兵攻勦專待糧集進發乃阿爾泰辦理幾及一月尚無運到者是伊有心貽誤軍務其罪實

在於此頃竟奏稱年老昏憤運糧事務亦不能勝任
請革職留於軍營効力是始終不肯以國事為念惟
圖置身事外倚老負恩天良何在阿爾泰著革職拏
問交與文綬派員看守候訊

庚申阿桂奏言西路軍營以鄂克什為正路而曾
頭溝為協勦之師南路軍營以卡了為正路而綽
斯甲布革布什咱為協勦之師必須卡了一路軍
威強盛則南路各土司方可藉以無恐且現在溫

福一路搗小金川之東又有曾頭溝一路以據其北若卡了一路再有多兵搗其西南犄角之形既成腹背受攻必難支禦如將南路調撥所餘及續調未到官兵歸併西路約咱一帶止為駐守之計則是名為三路其實僅有兩路賊番窺見南路力單勢必撤其精銳潛赴曾頭溝鄂克什等處據險固守恐西路亦未必即能奏功揆之全局似為無益至南路軍需遲誤究因辦理不善所致今既命

文綬總督四川復派大臣攸助從此悉心料理糧
儲自可無乏謹將實在情形從長熟計以據實覆
奏入

上諭軍機大臣曰阿桂覆奏南路之兵不宜分往西路
所奏甚是所有南路節次調派之兵應仍歸阿桂統
領妥辦昨據溫福議將第五次調赴南路之陝兵二
千改赴西路如現在未赴西路即令其仍歸南路備
用而以續調之湖廣兵二千調往西路若前項陝兵

已赴西路軍營即將湖廣之二千兵調赴南路著傳諭溫福阿桂酌量檄調並諭令陳輝祖知之

同日溫福豐昇額奏言七月十四日哈國興帶同鄂克什熟悉路逕之人由阿喀木雅山溝繞至瑪爾迪克山梁詳悉察看據稱策卜丹雖通美諾俱係深林仄逕賊番碉卡林立防守甚嚴官兵若由策卜丹前進其東南兩面賊境在在俱可抄截官兵後路現在只有陝甘兵三千名實嫌單弱查海

蘭察等現在攻勦瑪爾迪克賊番設立大柵踞守
鄂克什舊寨木闌壩之總路若加添兵力一面困
住大柵一面從旁繞道分兵攻壓或下木闌壩或
下鄂克什舊寨一處衝壓得力餘賊自不能支較
之取道策卜丹似為有濟今哈國興已於十七日
帶兵二千名逕赴瑪爾迪克山梁會同海蘭察等
剋日設法進攻但瑪爾迪克箐密山長西通策卜
丹木近本布爾桑岡必資大員帶兵防範臣等擬

派李煦於瑪爾迪克相近之貢噶地方駐扎以防後路而壯聲援於糧臺文報均為有益奏入

上嘉之

同日溫福豐昇額又奏言固卜濟山峯賊番安設木柵兩座石卡四座經官兵將卡座盡行奪取又燒燬木柵一座臣溫福即令官兵就近立木柵二座石卡三座將賊番山頂木柵圍困以便乘勢攻取又本月十五日夜有賊番三四百名於侍衛明

仁等所守木卡前分隊衝進亦經官兵殲戮甚多

餘賊鼠竄而去至

臣

豐昇額于美美卡附近連設

卡座斷絕賊番運糧取水之路察看美美卡大碉
南尚有大卡一座必將此卡攻奪然後可以直撲
大碉當令額森特彰霸等各帶兵于山巖突起處
東西設伏臣豐昇額由中路前進官兵奮勇衝突
有固原兵黃正首先躍入賊卡衆兵蜂擁而上將
卡內之賊盡行誅戮並將卡座拆毀其美美卡大

硃自可計日而得奏入

上諭內閣曰固原兵黃正奮勇先登甚屬可嘉著以千總用遇缺即補以示鼓勵

八月癸亥文綬奏言南路軍糧要緊自省至章谷一帶前經阿爾泰增價招商每石運價十五兩之外議增二三兩不等現因食物騰貴錢更昂辦運仍有未敷今議酌增為十九兩先行取保發價以期充裕至由章谷往卡了軍營原係撥派接運今

既添設橋座多僱站夫可可趨運無阻並招募殷
商自省直運卡了軍營省章谷僱夫接運之煩更
可源源接濟其南路新添綽斯甲布一路紆途仄
徑人力維艱從前未定章程今議給價招商一例
催運奏入

上嘉之

甲子文綬奏言川省驛站馬匹不敷應用查官兵
額設馬匹其存留各營者計有二千三百餘匹今

酌撥一千五百匹按驛站之遠近分撥應用既免
留營虛費馬乾而驛遞亦毋虞缺乏奏入

上嘉之

同日陳輝祖奏言楚省兵丁現在先撥三千赴川
合勘所有應借行裝銀兩先議存留一半到川給
辦第思成都官兵雲集同時添製衣物市價增昂
轉多耽延未便今即於楚省按名留銀四兩代製
皮衣帽一套委員解送餘銀逐名散給並咨明川

省督臣停辦以免墊發之繁奏入報

聞

丙寅溫福豐昇額奏言木坪土司甲爾叅納木卡
瓦寺土舍索諾木雍中俱屬實心奮勉並續派土
兵到營隨同協勦懇請酌量獎勵奏入

上諭內閣曰甲爾叅納木卡索諾木雍中俱著加恩賞
戴花翎並賞甲爾叅納木卡誠勤名號索納木雍中
謹慎名號以示鼓勵

同日溫福豐昇額又奏言臣等恭誦

諭旨所擬兩金川檄諭義正詞嚴實可褫么膺之魄但
若派隨征土兵齎往尚覺不值應俟其出柵叫號
求免鎗礮之時飭令通事曉諭發給或遇俘獲番
人擇無用者令其齎往仍一面督兵進攻使番衆
惶惑震懾稍有潰散賊酋自不能支奏入

上嘉之

同日

上諭內閣曰溫福等奏候補守備瑪什泰自抵軍營以來打仗攻柵甚屬奮勉著加恩補授松潘鎮右營守備

同日畢沅奏請陝省出征兵丁一體製辦衣帽解送軍營奏入報

聞

己巳阿桂奏言甲爾木山梁逼近金川為進取僧格宗要路由墨壘溝前進山形雖險一至山頂道

路尚寬自前次失利後賊番方以官兵不復從此
取道正可因其驕急迅圖進取臣商定後即派侍
衛鎮將等於各處隘口分防內酌撤出滿漢屯土
兵練派令明亮同副都統永平博靈阿侍衛德赫
布和隆武烏爾圖納遜總兵宋元俊及各侍衛章
京將備分隊帶領潛赴墨壘溝齊集二十一日進
至羣崢地方賊番瞭望不及之地稍為歇息是夜
月出後土兵在前引路按隊進發官兵魚貫而登

二十二日子刻將近賊卡大霧瀰漫乘其不備騰
撲入卡賊衆措手不及紛紛潰竄遂將第一道山
梁及各卡佔據官兵乘勝爭先所向披靡此一日
間且戰且前連搶山梁三道攻克石卡二十餘座
石碉四座山峯木柵一座所至殲賊多人其帶傷
逃去並墜落巖谷者不計外殺死頭目一名並搶
獲火藥刀矛器具甚夥官兵隨又帶同巴旺布拉
克底土兵別從深嘉卜一路搶上山峯將路通金

川之格魯克古地方佔住修立營盤扼其來路查
甲爾木山梁前可俯視僧格宗東可下壓達烏今
格魯克古已為官兵據定則金川賊衆來援路途
紆曲勢多不便若一面佔守山梁一面直取僧格
宗諒達烏前敵之賊可以不攻自潰奏入

上諭內閣曰阿桂奏覓間攻剿甲爾木山梁並已堵截
通金川要路所辦甚合機宜具見實心經理阿桂著
授為內大臣在事將弁均屬奮勉出力併著交部議

叙

上又諭軍機大臣曰南路自薛琮失利之後久未進兵
今阿桂攻克甲爾木山梁軍聲漸振但官兵自墨壟
溝進發已深入八九十里沿途堵守要隘需兵正多
而此次所帶之兵僅于各隘口分防內酌量抽撥恐
兵力不足不能乘勝深入所有第五次之陝兵二千
名即日自可全抵達烏又前次令湖廣預備之二千
兵起程前赴西路今南路正當相機進剿厚集兵力

自屬多多益善著即傳諭陳輝祖速飭帶兵之員將後調之二千兵過程前赴南路軍營以資調遣

同日阿桂又奏言川省產硝本少各路進勦所需火藥皆資隣省協濟自當極為撙節向來南路軍營解到火藥派有專員收放又有總兵英泰總理查核收存支領歷歷可稽不但不能透漏亦並不敢拋散且自約咱進攻山勢陡仄官兵繞澗緣崖掩其不備施用鎗礮處較少自上年八月扣至本

年六月軍營收過火藥共十八萬三千二百餘斤
現在尚存十二萬七千六百餘斤並無濫用透漏
諸弊查番人碉寨內穢污處所皆可出硝山澗溫
泉之下並產硫磺供用不乏臣惟謹遵

諭旨加意防範以免疎漏奏入報

聞

同日文綬奏言南路糧運卡了及綽斯甲布兩處
軍營存米各有三千餘石起運在途亦各數千石

至西路軍營存糧較多其董天弼一路現係松茂道查禮總辦已飭令詢明確由何路進兵速行設法趕運臣在省為兩路接應糧儲自可無誤奏入上諭軍機大臣曰文綬籌運兩路軍糧甚為妥協現在阿桂乘勝深入陝西湖廣後調之兵俱令前赴南路糧貯尤宜源源接濟以裕軍食至綽斯甲布係進勦金川分進之路所有此路兵糧亦當一律趲運以備將來進兵劉秉恬前經降旨調往南路自即星速馳

赴上緊督辦所有西路三雜谷一帶糧糈既已酌定
規條著即告知鄂寶令其接辦

上又諭軍機大臣曰布拉克底土司安多爾巴旺土婦
伽讓俱各督派所屬土兵隨同大兵進剿誠悃可嘉
安多爾著賞戴花翎并賞恭順名號伽讓著賞恭懿
名號並賞緞四疋以示鼓勵

平定兩金川方畧卷三十六

欽定四庫全書

平定兩金川方略卷三十七

八月士申溫福豐昇額奏言丹壩土司差人赴營投稟言金川要我幫兵並阻我投順

天朝懇請官兵及早前往駐守土司情願盡力報効等語是該土司見官兵勢盛堅心內向又因金川迫脅幫兵情急求援今董天弼已派兵前往則此後金川勾引併吞狡計無由施逞自為有益因將該

番順路遣往董天弼軍營令其就近酌諭遣回奏
入報

聞

同日溫福豐昇額又奏言曾頭溝一路糧運遲誤
屢次檄催軍需局布政司李本等及專派之松茂
道查禮彼此剖訴各執一詞現在飛咨督臣文綬
迅速清查仍就近籌辦以濟急需奏入

上諭軍機大臣曰曾頭溝一路間道分兵期于迅速制

勝今董天弼到彼已及月餘而內地糧石乏夫滾
運致遲進勦之期著傳諭文綬將此次糧運遲誤
緣由詳查據實嚴叅仍即會同鄂寶上緊派員趕
運使兵食日就充裕以便尅期進勦

同日溫福豐昇額又奏言兵丁應給長夫名數現
在未經畫一川省每兵百名給夫二十名黔省每
兵百名給夫三十名事關帑項自應隨時樽節不
可辦理分歧請通減為二十名以昭畫一奏入

上勅軍機大臣速議隨經軍機處議奏川兵近在本省
一切可以通融與黔兵隔省者不同前議川兵給
夫二十名黔兵給夫三十名因川黔兩省情形本
異原不得謂之辦理分歧溫福等之意祇為慎重
錢糧起見未經計及黔兵正在進勦應示體恤且
前議撥給已久不便遽行裁減仰承

聖訓當此軍務緊急之際不可顧惜小費應將黔兵長
夫仍以三十名給與

上從之

同日溫福豐昇額又奏言美美卡設立險卡堅礮
急切難以攻進臣等相度地勢莫若分左右兩路
潛由小徑繞至賊礮之前以便就近攻取隨於七
月二十六日夜挑兵一千三百兵派額森特烏什
哈達等帶兵兩翼分進臣溫福豐昇額及領隊大
臣舒常等在後分路接應二十七日天色將明兩
路會合直抵賊卡賊始知覺鎗石交發有四川兵

張世成西寧兵白文敬相繼攀登被石傷墜官兵奮勇爭先毫無畏避因值大雨地滑急不能上臣等暫令撤回此次殺賊三十餘人其受傷者甚多陣亡官兵六名並土守備阿桑及瓦寺鄂克什兵三名現在設法攻取以圖迅速克捷奏入

上諭內閣曰此次攻打出力官兵著溫福等查明送部議叙其張世成白文敬俱著千總銜議叙其陣亡土守備阿桑著照土練官員議叙之例加倍議叙之以示

格外優恤

同日溫福豐昇額又奏言七月二十四日提督李
煦所駐貢噶山左有賊千餘由策卜丹山竄下經
海蘭察哈國興率兵前往抵禦擊殺多人賊衆敗
回于貢噶山邊山峯碉內藏匿查貢噶之左與德
爾蘇地方連接乃海蘭察等軍營運糧必由之路
斷不可被其佔據因令遊擊富敏泰于德爾蘇地
方添立碉座與李煦接應保護糧道并令海蘭察

哈國興將貢噶左邊山峯賊碉設法攻取以防乘間抄截至二十七日賊番又於瑪爾迪克樹林內突出六七百人來擾待衛阿爾蘇納碉卡經海蘭察哈國興前往救應殺賊四十餘名賊衆逃入木城放鎗據守現在大營至瑪爾迪克糧石火藥等照常運送無虞奏入

上諭軍機大臣曰賊衆乘間擾截官兵糧道若非海蘭察哈國興厯練戎行隨機救應幾致踈虞海蘭察哈

國興著各賞荷包四個現大營至瑪爾迪克地方約
及百里軍糧運送絡繹不絕賊番詭譎多端或佔截
來路或從後侵擾溫福等務須加意防範并傳諭海
蘭察哈國興及守卡之侍衛章京等知之

臣等謹按賊衆以釜底遊魂負嵎拒守而其慣
技往往於大軍深入時乘間竊出滋擾為苟延
喘息之計伏讀

諭旨令溫福等加意防範仰見

睿慮周詳

訓示諄復么膺詭譎伎倆固已燭照靡遺矣

乙亥劉秉恬奏言西路糧運已出灌口者業有一

萬餘石因道路綿長背運不能迅速

臣

查由灌縣

至襍谷腦三百餘里山路陡峻紆迴其襍谷腦抵

軍營三百餘里山路陡峻必須人夫背運因就近

於灌縣買米一千石雇用牲口馱載派員押運襍

谷腦並先雇夫二千名空身至襍谷腦預備接運

路近力省庶不致於遲滯再灌縣境內產米頗多
臣已知會文綬撥銀二三萬兩存貯該縣就近接
濟又于曾頭溝一路召募鋪戶二十名前往開設
飯鋪以省背夫沿途炊爨耽延程途臣因西路軍
糧緊急暫留二三日料理停妥再赴南路奏入
上嘉之

同日文綬奏言鄂寶改赴西路劉秉恬尚在西路
未回現在阿桂乘勝進攻糧務緊急調夫應用經

糧員飛稟阿爾泰催取夫糧阿爾泰並未拆視直
送省城臣現即馳往南路督率催辦以期接濟奏

入

上諭軍機大臣曰阿桂攻克甲爾木山梁調夫一千名
應用阿爾泰接到糧員飛稟概不開視轉迂道郵送
成都於軍糧重務視同膜外實屬有心貽悞前將阿
爾泰革職拏問著文綬將此情節併案嚴訊定罪具
奏

丙子溫福豐昇額奏言調撥陝西第六次官兵所
餘一千名將次到省臣等飛飭帶兵各員令其迅
赴南路奏入報

聞

同日溫福豐昇額又奏言貢噶急切未能攻破海
蘭察哈國興商議誘賊出戰庶可乘機搶佔隨于
八月初一日先派兵各路設伏更令副將常祿保
等入林砍伐木植賊果前來接仗海蘭察哈國興

及侍衛阿爾蘇納等即領伏兵四路前進將近木
柵賊衆抵禦當經官兵勦殺退入木柵放鎗抵拒
又有賊番來援雖經官兵奮勇擊退而柵上鎗石
更緊因暫撤回此次殺賊百餘名被傷者甚衆官
兵亦陣亡數名二等侍衛伊爾庫脖受鎗傷署護
軍叅領華尚阿鎗傷左股幸各無礙至臣等轟打
美美卡又值砲裂現在另行融鑄以便相機進取
奏入

上諭曰伊爾庫奮勉可嘉着陞為頭等侍衛華尚阿亦著交部議叙

上又諭軍機大臣曰溫福等勦賊數月賊番據險死守未能迅速集事溫福豐昇額惟在同心合力獎勵官軍相機籌畫動出萬全方為有益若意存踈急惟事衝突徒致兵力挫損關係匪輕溫福等切勿孟浪致有疎虞現今阿桂由墨壘溝覓間潛進似有可乘之機着傳諭溫福阿桂將兩路情形通盤籌算計何路

可以速進何路需用多兵不難通融熟籌合力運辦
兩路軍營俱為朕辦事本無分彼此溫福等諒不致
稍存畛域之見也至曾頭溝一路為進攻底未遵提
徑若甘肅兵四子全到軍聲自當更壯設或尚須兵
力或可就近酌調以助董天弼之用溫福等當就該
處實情妥協籌辦佇聽捷音至董天弼前經賞戴孔
雀翎今仍加恩賞戴俾增體統務期倍前努力以副

恩眷

臣等謹案軍行利于神速固當電擊馳乘其
不備不可頓兵需日但值山徑崎嶇礪卡林立
守禦久經完固而賊番如鬼如蜮詭計百出之
時又宜相度機宜不嫌慎重伏讀

聖諭諄諄以挫損兵力為戒蓋預恐其躁急孟浪再三
飭諭務出萬全數千里外直不啻面命耳提矣

上又諭軍機大臣曰川省官兵前因派往滇省尚有應
扣之項其為數若干係屬何年之事何以至今尚未

扣完伊等現在隨征出力自應令其生計寬裕俾知
感奮乃仍照常坐扣殊不足以示體卹著文綬即將
此項應扣銀兩如何酌量停緩以紓兵力悉心籌議
具奏候朕降旨

戊寅阿桂奏言甲爾木山梁迤北尚有賊番碉卡
數座經明亮烏爾圖納遜直上攻撲接仗四五次
殺死金川克丹九寨大頭人一名並殲賊百餘因
山上鎗石抵禦甚急未能撲取加以山梁地極高

寒連日雨雪風雹兵丁僵凍甚多火藥口糧亦俱
沾濕久駐實為無益明亮等已將官兵撤回臣查
明亮等未經請示輒將已得甲爾木山梁退回不
守實屬非是應請將明亮降為二等侍衛烏爾圖
納遜降為四等侍衛以示懲儆臣現將在事將弁
兵丁分別懲叅外仍即督率官兵分路並進務期
一舉克復以慰

聖懷奏入

上諭軍機大臣曰阿桂奏官兵因風雪雨電氣候寒冷將已得之甲爾木山梁退回不守現今七月下旬即使雨電交加何至頓改寒暄此必係綠營恒怯駕詞撤退明亮等若於其時詢明倡議之二三人駢誅示衆軍心自定乃見不及此隨同撤回實有應得之咎領隊大臣隨從將軍叅贊固不可任意專擅若獨當一面遇有怯懦弁兵難於約束即於陣前斬徇以肅軍紀此又與專擅者不同如現在甲爾木官兵竟將

已得之地棄而弗守似此軍令廢弛何以鼓勵戎行
阿桂可弗憬然動念乎此次着照阿桂所請明亮降
為二等侍衛烏爾圖納遜降為四等侍衛念係初犯
僅予薄懲若不知懺惕復蹈前車軍律具在不能復
為寬宥也至退兵一節或彼時實係雪後風寒我兵
衣單難禦即勉強駐守山梁究竟不能施展萬一賊
番乘機掩襲更覺不成事體則全軍退回未可盡謂
之失計但在阿桂權宜酌辦則可將領以下不得援

此藉口也再官兵退回正恐繼進不易如其地難於
急圖深入又當於綽斯甲布一帶分途並進以為牽
制金川之計搃之軍行機要務在隨時斟酌合宜著
傳諭阿桂就現在情形悉心籌畫具奏以慰懸念

庚辰

上諭軍機大臣曰南路已得之甲爾木山梁忽因風雪
撤回西路當上緊攻碉時大礮又復炸裂此次軍務
每當機會可乘輒有阻滯此時自更當奮力勦除不

可稍存觀望試思僧格桑索諾木以內地土司敢於
狼狽為奸抗拒天兵其罪均在不赦此而不明正其
罪是王法有所不行國家又將何以駕馭各土司使
之畏威懷德因思金川歸順迄今未及二十年即已
負固跳梁如此彼時若能剪滅根株豈不永除後患
是前此之姑容已堪鑒戒况索諾木情罪更與莎羅
奔即卡不同從前金川未漸王化侵擾附近土司至
未敢與官兵顯抗悔罪乞降原可貸其一死索諾木

乃給受印依之土司敢於猖獗若此是勦滅之舉誠不可稍有游移也現在西路官兵距美諾俱為不遠小金川一隅自可尅期蕆事至金川賊衆不過恃其險遠兼有黨援可恃今綽窩土司朋楚克拉布丹及綽斯甲布各處皆為我用其勢既孤又幫助小金川賊衆經官兵殲戮必有畏怖之心若乘此機會大合兵力分道進攻賊番疲於支拒不能復顧農耕彼竭我盈勢將自潰此時正當同寅協恭一乃心力又何

慮不完此局且各土司踴躍出力正欲藉我兵威以
除大患若不拯其荼毒俾得共享安恬更非朕軫卹
番夷之意轉恐各土司首鼠兩端中多顧忌必致用
力不堅於軍務關係匪淺著傳諭溫福阿桂豐昇額
善為駕馭以收其效

同日鄂寶奏言曾頭溝一路糧運尚多阻滯臣訪
知此路中惟智固山最險然非冰雪凝結之時驟
駛儘可行走已飛札附近之崇慶等十州縣各雇

騾三百頭星解灌縣臣即于灌縣另買米三千石
趕運又恐一時不能接濟先買羊一萬隻解送以
備供支奏入

上嘉之

鄂寶又奏言查一夫負米五斗日行不過一站騾
馱可至一石每日能行二三站較為便捷請于陝
西產騾之處購買四千解川應用臣以軍糧緊急
一面飛咨陝西撫臣令其先行趕辦奏入

上諭軍機大臣曰西路軍糧既可用騾馱載南路自可
照辦雖雅州以南路崎嶇然于險仄之地安設人
夫接運至路寬處仍用騾頭馱載日行一二站自可
源源接濟西南兩路通融辦理計共用六千頭當足
濟事著傳諭劉秉恬文綬速與鄂寶通盤籌酌將兩
路所需騾數飛咨陝省調用

癸未溫福豐昇額奏言由德爾蘇至貢噶山梁賊
番新立碉卡經海蘭察哈國興帶同章京侍衛等

攻撲賊寨放鎗死拒運撲五次未能取勝官兵益
加奮勵冒鎗直進賊不能支遂將所立二卡全行
搶佔其南山梁一帶亦經章京德保等連奪三卡
奏入

上嘉之

戊子溫福豐昇額奏言查賊寨伺隙窺覷向來狡
猾伎倆臣等素所深知是以每攻進一處即留兵
駐守賊人屢次乘夜來擾無不殲戮多人餘賊潰

竄而去此時轉欲賊衆潛來可以盡力剿殺稍紓

憤恨

臣

等仍時時嚴飭將領加倍留心不致稍有

疎懈至南山瑪爾迪克近來攻勦情形

臣

等因為

時已久不能攻進焦急異常查南山綿長陡峻林

箐叢雜一望百餘里內層溝沓嶂要隘重重賊番

全力死守因地之險設築碉柵不下數百處其刺

卜楚克一山惟牛天界現攻之大木城為賊總路

必爭之地而固卜濟等處為之應援瑪爾迪克一

山惟海蘭察等現攻之大木城為鄂克什木闌堤
總路必爭之地而貢噶牛廠等處為之應援其沿
河中路賊卡柵亦層層列峙臣等自攻過阿喀
木雅之後牛天界等從德爾蘇繞至喇卜楚克沿
途攻獲碉卡不少而自五月十九日以來官兵日
夜連攻所有山梁上下左右破柵更多故沿河中
路頭敵官兵自阿克木雅已進十有餘里至于瑪
爾迪克一路自阿喀木雅已繞進八九十里此一

路自五月十三日後一帶賊番卡柵勒洗殆盡惟
北山之美美卡南山之木蘭埧險要地方尚未勦
破仰廛

聖懷昨又據哈國興等報稱貢噶山梁有賊偷擊石卡
今于八月初七初九等日搜剿菁林將賊卡奪回
又添築碉卡數座使聲勢聯絡以保無虞其瑪爾
迪克木柵又經派兵攻撲因柵內俱係地窖賊在
石板橫木之隙放鎗拒敵且週圍均挖有深溝難

以越過現今兵丁砍伐樹條既可作攬牌并可填塞深溝以便前進臣等現仍不時催督一俟辦有就緒即行馳奏奏入

上諭軍機大臣曰溫福等奏五月以後喇卜楚克一路節次攻破賊碉共十八座瑪爾迪克一路攻破賊碉共二十二座賊番所恃以抗拒者惟在碉卡聯絡得以運送薪米今溫福所得碉座不為不多若附近賊番要隘之處俱經攻毀則所拒守大碉已至孤立無

援輓輸不繼因何得以苟延日久且既云攻碉則或制其要害或斷其應援方為有益若所攻碉卡如許之多而於要隘毫無關涉豈不枉費兵力乎況賊番所守卡碉必不能多貯糧石乘其隨時運送相機遮截則守碉者將不攻自潰溫福等何見不及此著傳諭溫福等即將現在情形據實覆奏

同日畢沅奏言陝省節次調遣官兵駢運計用過騾七八千頭市騾未免稀少今據鄂寶咨稱陝甘

兵丁漸次到齊糧運尤關緊要用騾馱載較之人
夫輓運為易臣現在各府產騾多寡情形酌量給
價各向民間購買如數解川不致遲悞奏入

上諭軍機大臣曰畢沅奏陝省市騾稀少應向民間購
買自宜如此辦理但須嚴飭地方官據實給價無得
派累至節次赴川騾頭已有七八千之多不難即以
此馱運軍糧無須陝省廣為購買着傳諭文綬查明
此項騾頭現存若干就近派撥應用以節糜費而省

物力

己丑阿桂奏言據綽斯甲布土司具稟金川派兵
圖佔丹壩官寨丹壩土婦和爾郭求救于綽斯甲
布該土司已發兵往助臣以丹壩附近曾頭溝關
係緊要當即行知董天弼令其酌量前往馭防並
咨明溫福就近督辦惟是金川為小金川死力拒
守名為幫助寔已併吞又以為

天朝不遽加兵因乘間覬覦丹壩以見力有優餘情更

可惡今必當分兵先攻金川庶可堅各土司歸順之心並可寒逆豎助兇之膽且使金川賊番撤回自衛則小金川勢無可恃深入不難是綽斯甲布一路官兵寔難姑待臣令宋元俊尅日起程擬將附近土兵應領口糧暫時本折兼支並諭土司多出烏拉以供輓運宋元俊現在仍請添兵應使糧運稍充續調兵到再行酌量撥往奏入

一諭軍機大臣曰綽斯甲布一聞丹壩告急發兵往助

實屬恭順著阿桂酌加獎賞以示鼓勵計賊番到丹
壩地方較董天弼進兵之期尚早一日賊近我遠誠
恐緩不及事未知董天弼辦理若何至宋元俊帶兵
往綽斯甲布既可得其駕馭之力兼可控扼金川相
機襲擊該鎮現請添兵自應酌量派給以厚兵力今
已飛諭滇楚等兵馳赴南路阿桂將應派往綽斯甲
布之兵先檄知帶兵人員即由打箭爐逕往

同日

上諭內閣曰前阿爾泰宋元俊會叅桂林乖張欺罔至有將銀向金川贖取迷失兵丁之事因將桂林革職拏問特派福隆安馳往軍營勘問旋據審明桂林並無造屋居住驕縱不法各款至薛琮告急稟至桂林即派宋元俊赴援其發銀贖取兵丁一節係司員汪承霈及知州曹焜等已巳旺布拉克底土兵尋覓綠營迷失之兵頗為出力是以向糧員取銀脩賞曾經稟之桂林支發並非欲賞金川之人並審出宋元俊

構陷串飾情節則桂林尚非法所難貸但其在軍營內日親麪藥止圖已身安逸不能以士卒同甘苦而

北山梁傷損官兵數目並不查明據實陳奏亦不得

請之無罪桂林著加恩發往伊犁自備資斧効力贖

罪交與舒赫德令其在印房學習當差

同日

上諭軍機大臣曰湖廣總兵馬虎雲南副將斐慎並湖南副將札拉芬俱著赴南路軍營聽用

平定兩金川方略卷三十七